

ԾԸ. Եւ մտեալ թագաւորին Յազկերտի ըստ կարգելոյ ժամանակին յոստանն ի Վրկան եւ միահամուռ ամենայն աւագանոյն¹ եւ զաւրացն որ ընդ նմա էին՝ համարձակութիւն այնուիւտեւ տային բնակիչք շահաստանին որք ի Նիւշապուհն էին, ըստ հրամանին Դենշապիոյ, նախարարացն Յայոց որք ի դղեկին ի կապանսն էին՝ արձակել զմանկունս իւրեանց եւ կամ զայլ ոք որ ընդ Նոսա լինէին՝ ի պէտս արբանեկութեան ուր եւ կամիցին: 2 Չոր իբրեւ լուան երանելի երիցունքն խորէն եւ Աբրահամ՝ վաղվաղակի փութով ի Վրկան հասանէին, եւ անկեալք հրապարակաւ առաջի ամբարապետին Դենշապիոյ՝ բողոք բարձեալ ասէին, եթէ «Դու յորժամ զհոգեւոր տեսրսն մեր եւ զվարդապետս ի Նիւշապիոյ առեր գնացեր, ընդ որս եւ մեք կազմեցաք² ուղեկից³ լինել, եւ դու բռնաբար հրամայեցեր խիստ պահպանութեամբ արգելով զմեզ անդէն մինչեւ ցայժմ. արդ եթէ տարեալ ուրեք յերկիր աւտար եւ յանդարձ անցուցէք⁴ զնոսա՝ առնելով բարերարութիւն պատմեցէ՛ք զմեզ, երթալ եւ մեզ լինել անդարձ ընդ Նոսա. այլ կեալ անդէն եւ վախճանիլ պատրաստ եմք, տեսանելով եւեթ զնոսա, ցանկամք⁵ արժանի լինել. եւ եթէ սպանէք զնոսա՝ կամեցարո՛ւք եւ ի վերայ մեր տալ զնոյն հրաման, զոր պատուական եւ մեծարգոյ համարեաք զմահն այնպիսի քան զամենայն զփառս եւ զմեծութիւնս աշխարհիս»:

3 Եւ Վեհդենշապուհ լուեալ զայնպիսի բանս ի Նոցանէն, եւ ընդ համարձակութիւն աներկիւղածութեան արանցն զարմացեալ ինքն եւ ամենայն բազմութիւն հրապարակին՝ պատասխանի տուեալ ասաց ցերանելիսն, թէ «Զճանապարհ⁶ վարդապետացն ձերոց ոչ ոք ցուցանէ. բայց վասն ձեր հարցանեմք ցարքայից արքայ. նա իշխէ զոր ինչ հրաման տայ ի վերայ ձեր»:
4 Եւ մտեալ ի ներքս Դենշապուհ՝ պատմէր թագաւորին Յազկերտի զամենայն բանս եւ զխնդիրս երանելի երիցանցն: 5 Եւ թագաւորին⁷ հրաման տուեալ ասէ. «Թէ ի Նոցա վերայ վնաս ինչ ոք յայտ չառնէ, եւ դատախագ ոք չէ զհետ՝ երկիր պագցեն արեգական եւ պատուել⁸ զկրակն յանձն առցեն, եւ ընկալեալ զպարգէս մեծամեծս ի մենջ՝ արձակեսցին յաշխարհն իւրեանց. ապա թէ չհաւանեսցին յանձն առնուլ զմեր հրաման՝ պատուհաս կրեսցեն խեղութեամբ, եւ երթեալ յԱսորեստան մշակութիւն արասցեն ընդ արքունի մշակսն, եւ ի հարկի կայցեն մինչեւ ցվախճան իւրեանց»:
6 Եւ եկեալ Դենշա-

1 ՏՏ. աւագանոյն

2 ՏՏ. կամեցաք

3 Ատ. ուղեկից

4 ՏՏ. անդարձ անցուցէք

5 Զ. ցանկամք

6 ՏՏ. ճանապարհ

7 ՏՏ. եւ թագաւորն

8 ԲԳտ. պատուեալ